



Urs Schaeppi, il schef dal concern, è satisfatg dal resultat da la Swisscom da l'onn passà.

KEYSTONE

Swisscom ha fatg damain gudogn

Novas plazzas en las regiuns

DA LUCAS DEPLAZES / ANR

■ **L'onn passà ha Swisscom realisà in gudogn net dad 1,3 milliardas francs, quai che munta ina reduziun da 20,2%. Ils proxims onns vul Swisscom sbassar ils custs per 300 milliuns francs cun reducir ils centers d'infurmaziun. Per l'avegnir è bain preparada Swisscom.** L'onn 2015 ha Swisscom registrà ina svieuta dad 11,6 milliardas francs, quai vul dir ina leva reduziun da 0,2%. Il gudogn net da l'onn passà e sa sbassà per 20,2% sin 1,3 milliardas francs. In considerabel augment ha Swisscom realisà sin il sector da la comunicaziun mobila. Quella pretenda in augment massiv da la capacitat da transmissiun e grondas investiziuns. In svilup positiv han ins constatà sin il sector da la televisiun cun in augment da 166 000 sin 1,33 milliuns abunents. Positiv saja er sa sviluppada la «figlia taliana» Fastweb cun in augment da 6,2%.

Urs Schaeppi, il schef dal concern, è satisfatg dal resultat da l'onn passà. Swisscom sa chattia en in conturn difficil e dinamic. L'interpresa è operativa en in martgà da gronda concorrenza e caracterisada dad in svilup tecnic enorm. Ils basegns da capacitat dal sistem da transmissiun digitala a spectrum largt dublegian onn per onn e pretendan considerablas investiziuns. L'onn passà ha investì Swisscom en Svizra 1,8 milliardas

francs (l'onn 2005 var ina milliarda). Schaeppi ha punctuà che Swisscom veglia investir vinavant en la rait da comunicaziun e mantegnair sin ferma (emprima) posiziun sin il martgà da comunicaziun svizzer. Per la fin da l'onn 2015 èn colliadas cun la rait a spectrum ultra-lartg 2,9 milliuns chasadas ed interpresas. Da quellas disponan dus milliuns da la tecnologia la pli nova cun fibra da vaider. Sin il sector da la comunicaziun mobila dispona Swisscom da 59% dal martgà, Sunrise da 22% e Salt da 19%. Tenor Schaeppi èsi impurtant che la politica laschia a l'interpresa ina gronda libertad d'acziun e na reguleschia betg uschè rigurus sco l'Europa. Il squitsch sin il sector dals pretschs saja enorm. Custavan pli baud telefons en l'America considerablas taxas, pon ins telefonar oz là per part schizunt gratuitamain. Ils pretschs sa reduceschan onn per onn, ils custs per las investiziuns s'augmentan onn per onn, ha constatà il CEO da Swisscom.

Decentralisar ils call centers

Ils proxims onns vul Swisscom reducir ils custs per 300 milliuns francs cun diversas mesiras da raziunalisaziun e decentralisaziun dals call centers. Sis da quels vegnan serrads numnadamain: Turitg, Berna, Basilea, Geneva, Lucerna e Rapperswil (SG). Tut tenor basegn vegn augmentà il dumber da persunal a Cuira,

Blinzuna, s. Gagl, Sion, Olten, Biel, Neuchâtel e Losanna. Per la reduziun dal persunal èd elavurà in plan social e reservà 70 milliuns francs. Swisscom fa attent che il svilup da l'interpresa pretendia dentant er in augment dals posts da lavur. Quai è era stà il cas l'onn passa cun in augment da las plazzas da lavur per 512. Actualmain occupa schwa Swisscom en Svizra 19 000 persunas ed offrescha passa 900 plazzas d'emprendissadi.

Bain preparada per l'avegnir

Schaeppi ha accentuà la muntada da la telecomunicaziun moderna per nossa societad. Adina dapli secturs vegnan integrads en il sistem da la telecomunicaziun digitalisada. La Svizra veglia metter a disposiziun ina rait da comunicaziun la pli moderna e restar cumpetitiva sin quest sector.

22 francs per aczia

Sco ils ultims trais onns prevesa Swisscom er quest onn ina dividenda da 22 francs per aczia. La remuneraziun dal persunal dal concern sa basa sin in reglament e dependa dal success. Il salari da basa vegn pajà en daner blut e l'autra part en d'acziun. Urs Schaeppi, il CEO da Swisscom ha retratg 2015 en tut 1,773 milliuns francs, l'onn 2014 è quai stà 1,832 milliuns francs. La paja minimala per il persunal munta a 52 000 francs l'onn.